

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা

কর্তৃপক্ষ কর্তৃক প্রকাশিত

মঙ্গলবার, জানুয়ারি ১৪, ২০২০

বাংলাদেশ জাতীয় সংসদ

ঢাকা, ৩০ পৌষ, ১৪২৬ মোতাবেক ১৪ জানুয়ারি, ২০২০

নিম্নলিখিত বিলটি ৩০ পৌষ, ১৪২৬ মোতাবেক ১৪ জানুয়ারি, ২০২০ তারিখে জাতীয় সংসদে
উত্থাপিত হইয়াছে :—

বা. জা. স. বিল নং ০১/২০২০

সময়াবদ্ধ উন্নয়ন পরিকল্পনা গ্রহণ ও বাস্তবায়নের মাধ্যমে জনগণের মৌলিক চাহিদা
পূরণ এবং তাহাদের আর্থ-সামাজিক অবস্থার উন্নয়নের মাধ্যমে একটি উন্নত দেশ গড়ার
পরিকল্পনা বাস্তবায়নের লক্ষ্যে স্বায়ত্তশাসিত, আধা-স্বায়ত্তশাসিত, সংবিধিবদ্ধ সরকারি
কর্তৃপক্ষ, পাবলিক নন-ফাইন্যান্সিয়াল কর্পোরেশনসহ স্ব-শাসিত সংস্থাসমূহের তহবিলে
জমাকৃত উদ্বৃত্ত অর্থের সুষ্ঠু ব্যবহারের জন্য বিধান সম্বলিত আনীত বিল

যেহেতু স্বায়ত্তশাসিত, আধা-স্বায়ত্তশাসিত, সংবিধিবদ্ধ সরকারি কর্তৃপক্ষ, পাবলিক
নন-ফাইন্যান্সিয়াল কর্পোরেশনসহ স্ব-শাসিত সংস্থাসমূহের তহবিল উহাদের নিজস্ব আইন, আইনের
মর্যাদা সম্পন্ন দলিল ও বিধি-বিধান দ্বারা পরিচালিত হইয়া থাকে; এবং

যেহেতু উক্তরূপ সংস্থাসমূহ নিজস্ব তহবিল হইতে প্রয়োজনীয় ব্যয় নির্বাহের পরও উহাদের
তহবিলে বিপুল পরিমাণ অর্থ উদ্বৃত্ত থাকে; এবং

যেহেতু সরকার জনগণের আশা-আকাঙ্ক্ষা পূরণের লক্ষ্যে ব্যাপকভিত্তিক আর্থ-সামাজিক উন্নয়ন
পরিকল্পনা গ্রহণ করিয়াছে; এবং

(১১০৭)

মূল্য : টাকা ৮.০০

যেহেতু সরকার কর্তৃক গৃহীত ও গৃহীতব্য উন্নয়ন প্রকল্পসমূহ সময়াবদ্ধভাবে বাস্তবায়নের উপর উন্নত দেশ গড়ার লক্ষ্য অর্জন করা নির্ভরশীল; এবং

যেহেতু উন্নয়ন প্রকল্পসমূহ বাস্তবায়নের জন্য বিপুল পরিমাণ অর্থের সংস্থার প্রয়োজন; এবং

যেহেতু উপরি-বর্ণিত সংস্থাসমূহের তহবিলে রক্ষিত উদ্বৃত্ত অর্থের মালিকানা প্রকৃতপক্ষে জনগণের এবং সেই কারণে উক্ত অর্থ জনগণের কল্যাণ সাধনে ব্যবহার করা সমীচীন; এবং

যেহেতু উক্তরূপ সংস্থাসমূহের তহবিলে রক্ষিত উদ্বৃত্ত অর্থ সরকারি কোষাগারে জমা প্রদান করিবার লক্ষ্যে বিধান করা সমীচীন ও প্রয়োজনীয়;

সেহেতু এতদ্বারা নিম্নরূপ আইন প্রণয়ন করা হইল :—

১। সংক্ষিপ্ত শিরোনাম ও প্রবর্তন।—(১) এই আইন স্বায়ত্তশাসিত, আধা-স্বায়ত্তশাসিত, সংবিধিবদ্ধ সরকারি কর্তৃপক্ষ, পাবলিক নন-ফাইন্যানশিয়াল কর্পোরেশনসহ স্ব-শাসিত সংস্থাসমূহের তহবিলের উদ্বৃত্ত অর্থ সরকারি কোষাগারে জমা প্রদান আইন, ২০২০ নামে অভিহিত হইবে।

(২) ইহা অবিলম্বে কার্যকর হইবে।

২। সংজ্ঞা।—বিষয় বা প্রসঙ্গের পরিপন্থি কোনো কিছু না থাকিলে, এই আইনে—

(ক) “তফসিল” অর্থ এই আইনের তফসিল; এবং

(খ) “উদ্বৃত্ত অর্থ” অর্থ তফসিলভুক্ত কোনো সংস্থার বাৎসরিক পরিচালনা ব্যয়, নিজস্ব অর্থায়নে সরকারের পূর্বানুমোদনক্রমে গৃহীত উন্নয়ন প্রকল্প বাস্তবায়নের জন্য বাৎসরিক ব্যয় এবং বাৎসরিক পরিচালন ব্যয়ের ২৫ (পঁচিশ) শতাংশের অতিরিক্ত অর্থ।

৩। আইনের প্রাধান্য।—(১) আপাতত বলবৎ অন্য কোনো আইনে যাহা কিছুই থাকুক না কেন, তফসিলভুক্ত সংস্থাসমূহের তহবিলে রক্ষিত উদ্বৃত্ত অর্থ সরকারি কোষাগারে জমা প্রদানের ক্ষেত্রে এই আইনের বিধানাবলি প্রাধান্য পাইবে।

(২) এই আইনের উদ্দেশ্য পূরণকল্পে, তফসিলভুক্ত সংস্থাসমূহের তহবিলে রক্ষিত উদ্বৃত্ত অর্থ সরকারি কোষাগারে জমা প্রদানের ক্ষেত্রে আপাতত বলবৎ অন্য কোনো আইন বা আইনের বিধান যদি এই আইনের বিধানের সহিত অসামঞ্জস্যপূর্ণ হয়, তাহা হইলে সেই আইন বা আইনের বিধান যতখানি অসামঞ্জস্যপূর্ণ, ততখানি অকার্যকর বলিয়া গণ্য হইবে।

(৩) উপ-ধারা (১) ও (২) এর বিধান সত্ত্বেও তফসিলভুক্ত কোনো সংস্থা এই আইনের কোনো বিধানকে ব্যাহত করিবার উদ্দেশ্যে কোনো কার্যক্রম গ্রহণ করিলে উহা অকার্যকর মর্মে গণ্য হইবে।

৪। **তহবিল ব্যবস্থাপনা।**—(১) ধারা ৫ এর বিধান সাপেক্ষে, আপাতত বলবৎ অন্য কোনো আইনে ভিন্নরূপ যাহা কিছুই থাকুক না কেন, তফসিলভুক্ত কোনো সংস্থা উহার পরিচালনা ব্যয় এবং নিজস্ব অর্থায়নে সরকারের পূর্বানুমোদনক্রমে গৃহীত উন্নয়ন প্রকল্প বাস্তবায়নের জন্য বাৎসরিক ব্যয় নির্বাহের লক্ষ্যে প্রয়োজনীয় অর্থ নিজস্ব তহবিলে জমা রাখিতে পারিবে।

(২) তফসিলভুক্ত কোনো সংস্থা আপৎকালীন ব্যয় নির্বাহের জন্য যুক্তিসঙ্গত পরিমাণ অর্থ, যাহা বাৎসরিক পরিচালন ব্যয়ের সর্বোচ্চ ২৫ (পঁচিশ) শতাংশের সমপরিমাণ, উপ-ধারা (১) এ উল্লিখিত অর্থের অতিরিক্ত হিসাবে পৃথকভাবে সংরক্ষণ করিতে পারিবে।

(৩) তফসিলভুক্ত কোনো সংস্থার পেনশন ও ভবিষ্য তহবিল থাকিলে উহা পৃথকভাবে পরিচালনা করা যাইবে।

(৪) তফসিলভুক্ত সংস্থাসমূহে বাজেট বরাদ্দ হইতে প্রদত্ত অনুদান সরকার কর্তৃক নির্ধারিত পদ্ধতিতে প্রদান করা হইবে।

৫। **তহবিলের উদ্ধৃত্ত অর্থ জমা প্রদান।**—আপাতত বলবৎ অন্য কোনো আইনে ভিন্নরূপ যাহা কিছুই থাকুক না কেন, তফসিলভুক্ত কোনো সংস্থা কর্তৃক—

(ক) এই আইন প্রবর্তনের পর ধারা ৪ এ উল্লিখিত অর্থের অতিরিক্ত অর্থ অবিলম্বে সরকারি কোষাগারে জমা প্রদান করিতে হইবে; এবং

(খ) প্রতি অর্থ বৎসর সমাপ্ত হইবার তিন মাসের মধ্যে ঐ অর্থ বৎসরের উদ্ধৃত্ত অর্থ সরকারি কোষাগারে জমা প্রদান করিতে হইবে।

৬। **তহবিল সম্পর্কে সঠিক তথ্য প্রদান এবং ব্যত্যয়ের দণ্ড।**—কোনো সংস্থা তহবিলে রক্ষিত অর্থ সম্পর্কে সঠিক তথ্য প্রদান না করিলে, সরকার উক্ত সংস্থার সংশ্লিষ্ট কর্মচারীর বিরুদ্ধে প্রচলিত বিধি-বিধান অনুযায়ী ব্যবস্থা গ্রহণ করিতে পারিবে।

৭। **তফসিল সংশোধনের ক্ষমতা।**—সরকার, সরকারি গেজেটে প্রজ্ঞাপন দ্বারা, তফসিল সংশোধন করিতে পারিবে।

৮। জটিলতা নিরসনে সরকারের ক্ষমতা।—এই আইনের কোন বিধানের অস্পষ্টতার কারণে উহা কার্যকর করিবার ক্ষেত্রে কোন অসুবিধা দেখা দিলে, সরকার অন্যান্য বিধানের সহিত সামঞ্জস্য রাখিয়া, সরকারি গেজেটে প্রজ্ঞাপন দ্বারা, উক্ত বিধানের স্পষ্টীকরণ বা ব্যাখ্যা প্রদানপূর্বক উক্ত বিষয়ে করণীয় সম্পর্কে দিক-নির্দেশনা প্রদান করিতে পারিবে।

৯। বিধি, আদেশ, নির্দেশনা, সার্কুলার জারির ক্ষমতা।—এই আইনের উদ্দেশ্য পূরণকল্পে সরকার, সরকারি গেজেটে প্রজ্ঞাপন দ্বারা বিধি, আদেশ ও নির্দেশনা জারি করিতে পারিবে।

তফসিল
(ধারা ২ ও ৭ দ্রষ্টব্য)

ক্রমিক নং	প্রতিষ্ঠানের নাম
১	জাতীয় কারিকুলাম এবং টেক্সটবুক বোর্ড
২	বাংলাদেশ মাদ্রাসা শিক্ষা বোর্ড
৩	বাংলাদেশ কারিগরি শিক্ষা বোর্ড
৪	উচ্চ মাধ্যমিক ও মাধ্যমিক শিক্ষা বোর্ড, ঢাকা
৫	উচ্চ মাধ্যমিক ও মাধ্যমিক শিক্ষা বোর্ড, কুমিল্লা
৬	উচ্চ মাধ্যমিক ও মাধ্যমিক শিক্ষা বোর্ড, যশোর
৭	উচ্চ মাধ্যমিক ও মাধ্যমিক শিক্ষা বোর্ড, রাজশাহী
৮	উচ্চ মাধ্যমিক ও মাধ্যমিক শিক্ষা বোর্ড, সিলেট
৯	উচ্চ মাধ্যমিক ও মাধ্যমিক শিক্ষা বোর্ড, চট্টগ্রাম
১০	উচ্চ মাধ্যমিক ও মাধ্যমিক শিক্ষা বোর্ড, বরিশাল
১১	উচ্চ মাধ্যমিক ও মাধ্যমিক শিক্ষা বোর্ড, দিনাজপুর
১২	জাতীয় বিশ্ববিদ্যালয়, গাজীপুর
১৩	বাংলাদেশ উন্মুক্ত বিশ্ববিদ্যালয়
১৪	বাংলাদেশ পল্লী উন্নয়ন একাডেমী (বোর্ড)
১৫	পল্লী উন্নয়ন একাডেমী, বগুড়া
১৬	বাংলাদেশ কৃষি গবেষণা ইনস্টিটিউট
১৭	বাংলাদেশ বিজ্ঞান ও শিল্প গবেষণা পরিষদ
১৮	বাংলাদেশ ধান গবেষণা ইনস্টিটিউট
১৯	বাংলাদেশ মান নিয়ন্ত্রণ ও পরীক্ষা ইনস্টিটিউট (বিএসটিআই)
২০	বাংলাদেশ ইনস্টিটিউট অব ডেভেলপমেন্ট স্টাডিজ (বিআইডিএস)
২১	বাংলাদেশ কৃষি গবেষণা কাউন্সিল (বার্ক)
২২	জাতীয় স্থানীয় সরকার ইনস্টিটিউট
২৩	বাংলাদেশ পরমাণু শক্তি কমিশন
২৪	বাংলাদেশ কৃষি উন্নয়ন কর্পোরেশন (বিএডিসি)
২৫	পার্বত্য চট্টগ্রাম উন্নয়ন বোর্ড
২৬	রাজধানী উন্নয়ন কর্তৃপক্ষ (রাজউক)
২৭	চট্টগ্রাম উন্নয়ন কর্তৃপক্ষ (সিডিএ)
২৮	খুলনা উন্নয়ন কর্তৃপক্ষ (কেডিএ)
২৯	রাজশাহী উন্নয়ন কর্তৃপক্ষ (আরডিএ)

ক্রমিক নং	প্রতিষ্ঠানের নাম
৩০	বাংলাদেশ সেরিকালচার বোর্ড
৩১	রঞ্জানি উন্নয়ন ব্যুরো
৩২	বাংলাদেশ সেতু কর্তৃপক্ষ
৩৩	বরেন্দ্র বহুমুখী উন্নয়ন কর্তৃপক্ষ (বিএমডিএ), রাজশাহী
৩৪	বাংলাদেশ রঞ্জানি প্রক্রিয়াকরণ এলাকা কর্তৃপক্ষ (বেপজা)
৩৫	বাংলাদেশ টেক্সটাইল মিলস কর্পোরেশন (বিটিএমসি)
৩৬	বাংলাদেশ চিনি ও খাদ্য শিল্প কর্পোরেশন এবং সহযোগী প্রতিষ্ঠান
৩৭	বাংলাদেশ কেমিক্যাল ইন্ডাস্ট্রিজ কর্পোরেশন এবং সহযোগী প্রতিষ্ঠান
৩৮	বাংলাদেশ ইম্পাত ও প্রকৌশল কর্পোরেশন এবং সহযোগী প্রতিষ্ঠান
৩৯	বাংলাদেশ পেট্রোলিয়াম কর্পোরেশন
৪০	পেট্রোবাংলা
৪১	বাংলাদেশ শিপিং কর্পোরেশন
৪২	ট্রেডিং কর্পোরেশন অব বাংলাদেশ
৪৩	বাংলাদেশ জুট মিল কর্পোরেশন
৪৪	বাংলাদেশ সড়ক পরিবহন কর্পোরেশন (বিআরটিসি)
৪৫	বাংলাদেশ বন শিল্প উন্নয়ন কর্পোরেশন
৪৬	বাংলাদেশ মৎস্য উন্নয়ন কর্পোরেশন
৪৭	বাংলাদেশ চা বোর্ড
৪৮	বাংলাদেশ পর্যটন কর্পোরেশন
৪৯	বাংলাদেশ অভ্যন্তরীণ নৌ পরিবহন কর্পোরেশন (বিআইডব্লিউটিসি)
৫০	বাংলাদেশ অভ্যন্তরীণ নৌ পরিবহন কর্তৃপক্ষ (বিআইডব্লিউটিএ)
৫১	চট্টগ্রাম ওয়াসা
৫২	ঢাকা ওয়াসা
৫৩	বাংলাদেশ পানি উন্নয়ন বোর্ড
৫৪	পল্লী বিদ্যুতায়ন বোর্ড (আরইবি)
৫৫	চট্টগ্রাম বন্দর কর্তৃপক্ষ
৫৬	মোংলা বন্দর কর্তৃপক্ষ
৫৭	বাংলাদেশ বেসামরিক বিমান পরিবহন কর্তৃপক্ষ
৫৮	বাংলাদেশ ক্ষুদ্র ও কুটির শিল্প কর্পোরেশন
৫৯	বাংলাদেশ বিদ্যুৎ উন্নয়ন বোর্ড
৬০	বাংলাদেশ এনার্জি রেগুলেটরি কমিশন
৬১	বাংলাদেশ টেলিযোগাযোগ রেগুলেটরি কমিশন

উদ্দেশ্য ও কারণসম্বলিত বিবৃতি

বিভিন্ন স্বায়ত্তশাসিত/আধা স্বায়ত্তশাসিত প্রতিষ্ঠান, পাবলিক নন-ফাইন্যান্সিয়াল কর্পোরেশনসহ অন্যান্য স্ব-শাসিত প্রতিষ্ঠানসমূহ তাদের নিজস্ব আইন ও বিধি অনুযায়ী আয়-ব্যয় ও বছর সমাপনান্তে তাদের হিসাব রক্ষণাবেক্ষণ করে থাকে। ব্যাংকে রক্ষিত হিসাবসমূহের স্থিতি হতে দেখা যায় যে, বর্ণিত প্রতিষ্ঠানসমূহের বিভিন্ন ব্যাংক হিসাবে বিপুল পরিমাণ অর্থ জমা পড়ে আছে। সংস্থাসমূহের তহবিলে রক্ষিত উদ্বৃত্ত অর্থের মালিকানা প্রকৃতপক্ষে জনগণের এবং সেই কারণে উক্ত অর্থ জনগণের কল্যাণ সাধনে ব্যবহার করা সমীচীন। জনগণের আশা আকাঙ্ক্ষা পূরণের লক্ষ্যে সরকার ব্যাপকভিত্তিক আর্থ-সামাজিক উন্নয়ন পরিকল্পনা গ্রহণ করেছে। উক্ত পরিকল্পনা ও গৃহীতব্য উন্নয়ন প্রকল্পসমূহ সময়াবদ্ধভাবে বাস্তবায়নের উপর নির্ভর করছে উন্নত দেশ গড়ার লক্ষ্যে অর্জন। উক্ত প্রকল্পসমূহ বাস্তবায়নের জন্য বিপুল পরিমাণ অর্থের সংস্থান প্রয়োজন, যা বর্তমান সংগৃহীত রাজস্ব দ্বারা মেটানো দুরূহ। উন্নয়নের অগ্রযাত্রায় সাফল্যের ধারাবাহিকতা বজায় ও সরকারি অর্থের সুষ্ঠু ব্যবস্থাপনা নিশ্চিতকল্পে উল্লিখিত সংস্থাসমূহের তহবিলে রক্ষিত উদ্বৃত্ত অর্থ সরকারি কোষাগারে জমা প্রদানের মাধ্যমে বর্তমান সরকার কর্তৃক গৃহীত উন্নত দেশ গড়ার পরিকল্পনা বাস্তবায়নের লক্ষ্যে স্বায়ত্তশাসিত, আধা-স্বায়ত্তশাসিত, সংবিধিবদ্ধ সরকারি কর্তৃপক্ষ, পাবলিক নন-ফাইন্যান্সিয়াল কর্পোরেশনসহ স্ব-শাসিত সংস্থাসমূহের উদ্বৃত্ত অর্থ সরকারি কোষাগারে জমা প্রদান আইন, ২০২০ শীর্ষক খসড়া বিলটি প্রণয়ন করা সমীচীন।

আহম মুস্তফা কামাল

ভারপ্রাপ্ত মন্ত্রী।

ড. জাফর আহমেদ খান

সিনিয়র সচিব।

মোঃ তারিকুল ইসলাম খান, উপপরিচালক, বাংলাদেশ সরকারী মুদ্রণালয়, তেজগাঁও, ঢাকা কর্তৃক মুদ্রিত।

মোঃ আব্দুল মালেক, উপপরিচালক, বাংলাদেশ ফরম ও প্রকাশনা অফিস, তেজগাঁও,

ঢাকা কর্তৃক প্রকাশিত। website : www.bgpress.gov.bd